



Voss herad sin høyringsuttale

Planprogram – Regional plan for klima 2022 – 2032

Voss herad tykkjer det er både positivt og inspirerande at Vestland fylkeskommune har store ambisjonar på eit så viktig felt som klima og berekraftig samfunnsutvikling. Særleg viktig er det regionale planarbeidet for Voss herad som no er i startgropa for å utarbeida eigen kommunedelplan for klima, klimatilpassing og grøn omstilling – Vossaklima 2030.

Eit tett samspel mellom fylket og dei kommunane i Vestland som no er i gang med å utarbeida eigne klimaplanar vil vera både viktig og nyttig i den vidare prosessen. Slik vil me saman kunna bidra i arbeidet med å skapa eit framtidig godt, berekraftig og trygt nullutsleppssamfunn.

I samband med at Vestland fylkeskommune ber om synspunkt på utkast til planprogram har det vore invitert til høyringsmøte. Voss herad set pris på desse møta, men dersom me skal kunna dra nytte av dei lyt samlingane verta lagt tidlegare i høyringsperioden. Berre slik kan me vareta eiga sakshandsaming og politisk saksgang samstundes som me får med oss dei gode innspela som kjem fram i høyringsmøta.

Til dei ulike spørsmåla fylkeskommunen ynskjer innspel på har Voss herad fylgjande kommentarar:

1. *Val av hovudområde og plantema*

Voss herad støttar i hovudsak opp om valte hovudområde og plantema slik det er skissert i utkast til planprogram. Det er positivt at naturmangfald er integrert som del av det vidare arbeidet og at klimarettferd får særskilt fokus.

Det er positivt at fylket legg opp til å vurdere naturmangfald, klimautslepp og klimatilpassing som eit samspel, ettersom dei gode løysingane ligg i overlappinga mellom desse tema. I tillegg kan dette samspillet sjåast i eit større perspektiv. Manglande miljømessig berekraft i sum er tett knytt saman med ein økonomisk veksttanke, og handlemønster som driv og er driven av ein tanke om å stadig auka vår aktivitet, eller produsere meir av noko. Voss Herad ynskjer difor at fylket gjer ei kritisk vurdering av korleis økonomisk vekst står i konflikt med miljø som heilskap, og korleis ein vil handtere denne motsetninga. Sentralt i slike vurderingar er skilnaden mellom materiell levestandard og livskvalitet. Difor kan det vere fruktbart å inkludere miljø-filosofiske, -sosiologiske og -psykologiske



perspektiv, og sjå på mogelegheitene i å sameine dei tre overordna tema, gjennom å etablere nye berekraftige levemåtar og tankesett.

I utkast til planprogram står at regional klimaplan ikkje vil ta opp tema knytt til ny produksjon av energi og eventuell arealbruksendring som følgjer av dette. Men, regional klimaplan skal, som del av å gjera greie for prioriterte utsleppskjelder i arbeidet med samfunnsutviklinga, sikra næringsutvikling som del av klimaomstilling av samfunnet. Voss herad meiner at noko av løysinga for å sikra ei berekraftig næringsutvikling som del av klimaomstillinga i samfunnet er å leggja til rette for å nytta meir kraft der den vert produsert, og slik stimulera lokal næringslivsutvikling. Dette vil igjen kunna innebera ny næringsutvikling i distrikta og bidra til at me får tatt heile fylket i bruk på berekraftig sett. Kraftfylket Vestland, med fylkeskommunen i spissen, burde ta initiativ til ordningar som innebar at det vart lettare å få aksept for at krafta skal nyttast der den vert produsert. Om denne problemstillinga skal lyftast fram i regional klimaplan, regional plan for innovasjon og næringsutvikling eller i regional plan for fornybar energi kan diskuterast, men poenget lyt varetakast også i overordna regional planlegging.

2. Medverknad i planarbeidet

Fylkeskommunen legg opp til ein brei og god medverknadsprosess der det vert lagt vekt på at born og unge vert invitert inn i arbeidet. Voss herad støttar opp om dette.

Kommunane er nemnt som ein naturleg samarbeidspart i arbeidet og Voss herad ser fram til å verta invitert med inn i relevante arbeidsgrupper.

Fylkeskommunen ynskjer også å «*nyttja etablerte partnerskap og nettverk – for å vidareutvikla gode samarbeid og partnerskap*». Her vil Voss herad vil oppmoda Vestland fylkeskommune til å verta del av det KS- initierte [Bærekraftsnettverket](#) der både Voss herad og Bergen kommune vart medlemmer tidlegare i år. Bærekraftsnettverket er eit godt fora for kunnskapsdeling og vidare arbeidet med å realisera FN sine bærekraftsmål på lokalt og regionalt nivå.

3. Skissert behov for utgreiingar/ oppdatert kunnskapsgrunnlag

Det er eit stort behov for auka kunnskapsgrunnlag på klimaområdet generelt og kanskje særleg på det som gjeld indirekte utslepp og «folkets fotavtrykk». I fylkeskommunen sitt vidare arbeid med å oppdatere og vidareutvikla kunnskapsgrunnlaget vil det vera nyttig om dette vert gjort på eit sett som gjer det mogeleg for kommunane å nytta same kunnskapsgrunnlag i eige planarbeid.

Det same vil gjelda i samband med at det skal utarbeidast indikatorar for oppfylging i åra som kjem. Voss herad har nyleg starta opp arbeidet med å gjennomføra [KPI – analyse i regi av U4SSC](#). Analysen vil omfatta 92 forskjellige indikatorar som målar kor berekraftige me faktisk er i dag, og kvar me bør arbeida vidare for å styrka ei berekraftig lokalutvikling i tråd med FN sine bærekraftsmål. Bærekraftsmåla relatert til klima og miljø vert her satt i samband med alle dei andre bærekraftsmåla. Møre og Romsdal fylkeskommune er i sluttfasen på arbeidet med å gjennomføra KPI analyse for alle kommunane i fylket og vil då ha eit nyttig felles indikatorverktøy som ikkje berre kan nyttast til internt arbeid i kommunane, men også til benchmarking med andre kommunar i eige fylke, og med andre kommunar nasjonalt – og internasjonalt. Voss herad oppmodar Vestland fylkeskommune til å vurdere same framgangsmåte som Møre og Romsdal har hatt på dette området.



Voss herad

4. Organisering av arbeidet

Voss herad har ikkje anna merknad til opplegg for organisering av planprosessen anna enn at det heile tida vert sikra at *heile* fylket er med.

Voss herad ynskjer Vestland fylkeskommune lukke til i det vidare viktige arbeidet og ser fram til å vera ein aktiv del av dette.